



特別
18
3414
12






門 八 18
號 3414
卷 12

御訂全金詩增補中州集卷四十二

金元好問原本

郝天挺 一首 補五首

天挺字晉卿陵川人家世儒素伯父子颺
有詩名號東軒老人先生少日有賦聲早
衰多疾厭於名場遂不復就舉貞祐之兵



避於河南往來淇衛閒爲人有崖岸耿耿
自信寧落薄而死終不一徇富兒之門年
五十七卒於舞陽臨終浩歌自得不以死
生爲意其平日自處爲可見矣好問十四
五先人令陵川時從先生學舉業先生教
之曰今人賦學以速售爲功六經百氏分
磔綴緝外或篇題句讀之不知幸而得之
不免爲庸人況一敗塗地者乎又曰讀書

不爲藝文選官不爲利養唯通人能之又
曰今世仕宦多用貪墨敗官皆苦於饑凍
不能自堅者耳男子生世不耐饑寒則雖
小事不能成子試以吾言求之先生工於
詩時命好問屬和或言令之子欲就科舉
詩非所急將無徒費日力耶先生曰君自
不知所以教之作詩正欲渠不爲舉子耳
子思溫字和之孫經字伯常今居順天

全金詩卷四十一
二
附元好問郝先生墓銘泰和初先人調官
中都某甫成童學舉業先人思所以引而
致之者謀諸親舊閒皆曰濩澤風土完厚
人質直而尚義在宋有國時俊造輩出見
於黃魯直季父廉行縣之詩風俗旣成益
久益盛迄今帶經而鉏者四野相望雖閭
巷細民亦能道古今曉文理爲子求師莫
此州爲宜於是先人乃就陵川令之選時

鄉先生郝君方聚子弟秀民教授縣庠先
生習於禮義之俗出於賢父兄教養之舊
且嘗以太學生游公卿閒閱人旣多慮事
亦審故其容止可觀而話言皆可傳州里
老成宿德多自以爲不及也某旣從之學
先生嘗教之曰學者貴其有受學之器器
者何慈與孝也今汝有志矣器如之何又
曰今人學詞賦以速售爲功六經百氏分

裂補綴外或篇題句讀之不知幸而得之
且不免爲庸人況一敗塗地者乎先人旣
罷官某留事先生又二年然後歸先生歿
於成臯其子思溫歸葬鄉里以書抵某言
吾子往年赴弔成臯曾以墓銘爲請今卒
事矣願有以慰不肖孤之心某謝不敢當
六七年之間思溫之請益堅辛丑之秋又
屬其外兄牛元偉來致辭曰先子生無一

命之爵歿無十金之產賫志下泉有識興
嘆授業得如吾子者且不能一言半辭以
見於後世其命之矣某再拜曰僕有罪乃
叙而銘之先生諱天挺字晉卿先世有自
太原遷上黨者宋末又遷陵川遂爲陵川
人曾祖諱元祖諱璋考諱昇以遷擇爲縣
功曹至先生之伯父東軒先生始宦學蔚
爲聞人先生少日舉進士預春官氏薦書

便能出諸公之右多疾早衰厭於名場遂
不就選以某年月日邁疾春秋五十有七
終於寓舍前娶同縣張氏繼室高平司氏
子男一人卽思溫也女一人嫁進士侯公
佐男孫三人曰經曰恒曰彝經最知名女
孫一人弟天禔從弟天祐猶子思忠皆有
聲場屋閒銘曰篤於其資誠於其思行可
以士矩政可以吏師奉璋峩峩其誰曰我

私昇鎡基而奪之時操利器而莫施窮巷
抱書涅而不緇曳履商謳長與世辭寧以
一寒暑往來之斲槩細人而怨咨良璞含
光平價不貲棄擲泥塗識者涕泗孰物之
尸孰命之司吾欲問之有如先生者而至
於斯有如先生者而止於斯

送門生赴省闈

青出於藍青愈青小年場屋便馳聲未饒徐淑早

求舉却笑陸機遲得名嗟我再衰空眊矚喜君初
筮已崢嶸此行占取鼇頭穩平地烟霄屬後生

題麻姑壇

路入雲關仙境佳瓊田瑤草帶烟霞貯經洞古無
遺檢養藥爐存失舊砂青鳥不傳金母信紫鸞應
返玉皇家巖扉書不掩春長在開盡碧桃千樹花

蓮花菊

千丈花開玉井遙翻成叢菊老秋標寒枝白日塵

無點凍蘂經霜瓣不凋依徑香生妃子步遶籬嫩
比六郎嬌雙歌一曲淵明醉辜負扁舟冷畫橋

遊石壁有呈二首

廊廟雍容四十秋旱爲霖雨濟爲舟五湖寵過已
黃髮六詔歸來方黑頭後部風雷詩鼓吹前途山
水酒觥籌試看絕壁秋雲句知是承平宰相遊
絕壁秋容勝荒壇冷氣清野僧留客飲山鳥背人
鳴已極登臨興無窮今古情浩歌一樽酒四海共

昇平

題宣聖廟

金碧煌煌梵刹雄
玄元樓觀五雲中
如何萬代綱常祖
釋奠今無數畝宮

附青鞋踏雪志汾州學宮門右有石嵌壁中乃金郝天挺募建文廟疏其文伏以下書絕句一首卽接謹疏字

附陵川文集郝天祐字賢卿陵川人貞祐

初隱居魯山作古文歌詩尤玩意書法嘗以爲正書當以篆隸意爲本而鍾王書之經也顏坡書之傳也其餘則諸子百家耳故其筆勢莊重秀勁能作文餘楷草嘗言大字雖大而小小字雖小而大正書須有草意草書須有正筆其論書如此

附李詡戒菴老人漫筆唐詩鼓吹舊云郝天挺注金又有一郝天挺兩山墨談亦考

之不審

溪南詩老辛愿 二十首

愿字敬之福昌人其大父自鳳翔來居縣
西南女几山下以力田爲業敬之自號女
几野人年二十五始知讀書取白氏諷諫
集自試一日便能背誦乃聚書環堵中讀
之書至伊訓詩至河廣頗若有所省欲罷
不能因更致力焉音義有不通者搜訪百
至必通而後已有一事闕十年者由是博

極羣書於三傳爲尤精至於內典亦稱該
洽杜詩韓筆未常一日去其手作文有綱
目不亂詩律深嚴而有自得之趣性野逸
不脩威儀貴人延客敬之麻衣草履足脛
赤露坦然於其間劇談豪飲旁若無人高
獻臣爲河南治中聞其名引爲上客及獻
臣爲府尹所誣敬之亦被訊掠幾被一網
之禍自是人以敬之之名爲諱絕不與友

不二三年日事大狼狽田五六十畝歲入
不足一牛屢爲追胥所奪竟賣之以爲食
衆雛嗷嗷張口待哺雅負高氣不能從俗
俯仰迫以饑凍又不得不與世接其枯槁
憔悴流離頓踣往往見之於詩元光初予
與李欽叔在孟津敬之自女儿來爲之留
數日其行也欽叔爲設饌備極豐腆敬之
放箸而歎曰平生飽食有數每見吾二弟

必得美食明日道路中又當與老饑相抗
去矣會有一日辛老子僵臥柳泉韓城之
閒以天地爲棺槨日月爲含穢狐狸亦可
螻蟻亦可耳予二人爲之惻然敬之佳句
極多如自憐心似魯連子人道面如裴晉
公萬事直須稱好好百年端欲副休休院
靜寬留月窓虛細度雲浪翻魚出浦花動
鳥移枝之類恨不能悉記耳

木棲云吟窓
醉几秋風晚

只許幽人箇裏知三鄉光武廟云方
山青遶一川斜到其處知爲工也予嘗

論敬之士之有所立必藉國家教養父兄
淵源師友講習三者備而後可喻如世之
美婦多出於膏腴甲族薰醲含浸之下閭
閻閒非無名色一旦作公夫人則舉步羞
澀曾大家婢不如其理然也故作新人材
言教育也獨學無友言講習也生長見聞
言父兄也至於傳記所載西子乃苧蘿山

采薪氏之女越君臣教之容止七日而納
之王遂能惑夫差傾吳國豈常理也哉敬
之落落自拔耿耿自信百窮而不憫百辱
而不沮任道致遠若將死而後已者三十
年亦可謂難矣南渡以來詩學爲盛後生
輩一弄筆墨岸然以風雅自名高自標置
轉相販賣少遭指擿終死爲敵一時主文
盟者又皆汎愛多可坐受愚弄不爲裁抑

且以激昂張大之語從臾之至比爲曹劉
沈謝者肩摩而踵接李杜而下不論也敬
之業專而心通敢以是非白黑自任每讀
劉趙雷李張杜王麻諸人之詩必爲之探
源委發凡例解絡脉審音節辨清濁權輕
重片善不掩微類必指如老吏斷獄文峻
網密絲毫不相貸如衲僧得正法眼徵詰
開示幾於截斷衆流人有難之者則曰我

雖不解書曉書莫如我故始則人怒之罵
之中而疑之已而信服之至論朋輩中有
公鑒而無姑息者必以敬之爲稱首蓋不
本於教育不階於講習不出於父兄而卓
然成就如此然則若吾敬之者真特立之
士哉

劉景玄趙宜之雷希顏李欽叔
張仲經杜仲梁王仲澤麻知幾

補歸潛志辛愿敬之河南人自號女几野

人又號溪南詩老幼嗜書苦學坐環堵數

年由是六經百家無不通貫喜作詩五言
尤工人以爲得少陵句法平生不爲科舉
計且未嘗至京師砉然中州一逸士也爲
人質苦不閑世事麻條草履或倚杖讀書
市中人訝之亦不卹嘗謂王鬱飛伯曰王
侯將相世所共嗜者聖人有以得之亦不
避得之不以道與夫居之不能行已之志
是欲澡其身而伏於廁也此言他人難聞

子宜保之此可見其志趣也貞祐初先子
主長葛簿敬之素不識聞名來謁相得甚
懽及別厚贈之歸而買牛使其子躬耕以
自給居女几山下往來長水永寧閒惟以
吟詠講誦爲事朝士大夫願交而不得也
正大中先子令葉復來游後歸洛下病歿
有詩數千首常在竹橐中其佳句有云院
靜寬留月窓虛細度雲又鶯銜晚色啼深

樹燕掠春陰入短墻又波搖朗月浮金鏡
嶺隔華星斷玉繩又箕山潁水春風裏喚
起巢由共一杯又黃綺暫來爲漢友巢由
終不是唐臣真處士詩也

附元好問楊叔能小亨集引貞祐南渡後
詩學大行初亦未知適從溪南辛敬之淄
川楊叔能以唐人爲指歸敬之舊有聲河
南叔能則未有知之者興定末叔能與子

會於京師遂見禮部閒閒公及楊吏部之
美二公見其幽懷久不寫及甘羅廟詩嘖
嘖稱嘆以爲今世少見其比及將往關中
張左相信甫李右司之純馮內翰子駿皆
以長詩贈別閒閒作引謂其詩學退之此
日足可惜頗能似之至比之金膏水碧物
外自然奇寶景星丹鳳承平不時見之嘉
瑞叔能用是名重天下今三十年然其客

於楚於漢沔於燕趙魏齊魯之閒行天下
四方多矣而其窮亦極矣叔能天資澹泊
寡於言笑儉素自守詩文似其爲人其窮
雖極其以詩爲業者不變也其以唐人爲
指歸者亦不變也今年其所撰小亨集成
其子復見予鎮州以集引爲請予亦愛唐
詩者唯愛之篤而求之深故似有所得嘗
試妄論之詩與文特言語之別稱耳有所

記述之謂文吟咏情性之謂詩其爲言語則一也唐詩所以絕出於三百篇之後者知本焉爾矣何謂本誠是也古聖賢道德言語布在方冊者多矣且以弗慮胡獲弗爲胡成無有作好無有作惡樸雖小天下莫敢臣較之與祈年孔夙方社莫不敬共明神宜無悔怒何異但篇題句讀不同而已故由心而誠由誠而言由言而詩也三

者相爲一情動於中而形於言言發乎邇而見乎遠同聲相應同氣相求雖小夫賤婦孤臣孽子之感諷皆可以厚人倫美教化無他道也故曰不誠無物夫不誠故言無所主心口別爲二物物我邈其千里漠然而往悠然而來人之聽之若春風之過馬耳其欲動天地感神鬼難矣其是之謂本唐人之詩其知本乎何溫柔敦厚藹然

仁義之言之多也幽憂憔悴寒饑困憊一
寓於時而其阨窮而不憫遺失而不怨者
故在也至於傷讒疾惡不平之氣不能自
揜責之愈深其旨愈婉怨之愈深其辭愈
緩優柔饜飫使人涵泳於先王之澤情性
之外不知有文字幸矣學者之得唐人爲
指歸也初予學詩以十數條自警云無怨
懟無謔浪無驚狠無崖異無狡計無媼阿

無傳會無籠絡無銜鬻無矯飾無爲堅白
辨無爲聖賢癡無爲妾婦妬無爲仇敵謗
傷無爲聾俗閔傳無爲瞽師皮相無爲黥
卒醉橫無爲黥兒白捻無爲田舍翁木強
無爲法家醜詆無爲牙郎轉販無爲市倡
怨恩無爲琵琶娘人魂韻詞無爲村夫子
兔園策無爲算沙僧困義學無爲稠梗治
禁詞無爲天地一我今古一我無爲薄惡

所移無爲正人端士所不道信斯言也予
詩其庶幾乎惟守之不固竟爲有志者之
所先今日讀所謂小亨集者祇以增媿汗
耳予旣以如上語爲集引又申之以種松
之詩因爲復言歸而語乃翁吾老矣自爲
瓠壺之日久矣非夫子亦何以發予之狂
言已酉秋八月初吉河東元某序

亂後

兵去人歸日花開雪霽天川原荒宿草墟落動新
煙困鼠鳴虛壁饑鳥啄廢田似聞人語亂縣吏已
催錢

贈趙仲常

名憲宜之從弟詩有黃塵袞袞
時隨脚華髮蕭蕭老壓頭之句

趙子年雖小論詩樂最深秋風凡幾首冬日更多
吟老大吾無力文章爾用心荒山松竹底莫厭數
相尋

過崧山

催老年光袞袞來好懷知欲向誰開箕山潁水春
風裏呼起巢由共一杯

隆德故宮

蛇分鹿死已無秦五十年來漢苑春問著流鶯無
一語柳條依舊拂墻新

同趙長水汎舟

洛水秦山晚自澄孤洲煙樹綠相仍波搖朗月浮
金鏡嶺隔華星斷玉繩但覺轉船驚白鳥豈煩揮

翠怒青蠅風塵浩蕩飄蓬裏愧似林宗陪李膺

山寒

山寒春靜早關門新月微光照短垣可恨莫雲歎
落景却將殘靄助黃昏

陋室

陋室何妨似燕窠莫年終得返魚蓑壺中日月時
常好枕上功名不足多往古來今真夜旦高天厚
地一且羅鹿門幸有龐公樂牛角徒爲甯戚歌

亂後還三首

兵戈爲客苦思鄉春莫還鄉却自傷典籍散亡山
閣冷松筠憔悴野園荒鶯銜晚色啼深樹燕掠春
陰入短墻鄰里也知歸自遠競將言語慰淒涼
亂後還家春事空樹頭無處覓殘紅棠梨妥雪霑
新雨楊柳飄綿颺晚風談笑取官驚小子艱難爲
客媿衰翁殘年得見休兵了收拾閒身守桂叢
春來漂泊心情減老去艱危氣力微芳草際天愁

思遠干戈滿地故人稀懷金躍馬時何有問舍求
田事已違糲食敝衣聊自足白頭甘息漢陰機

題游彥明林園三首

先生未老厭儒冠築屋栽籬守歲寒經史日長常
滿案魚鰕溪近得供盤幽花入室無多種瘦竹關
情只數竿瀟灑遠辭車馬跡求官何必近長安
城郭繁華斷往還林園幽閒養高閒花低暖藥斜
窺水竹亞晴梢巧避山樽俎歲時君得意風埃南

北我何顏丹房藥鏡游心久不惜哀矜洗病辱
不礙遙看冷翠微儘教叢竹映窓扉籬根傍水魚
知樂屋角隣花鳥自歸濁酒野芹安已久華軒高
馬到從稀人間回首皆堪鄙羨汝幽棲得所依

贈劉菴主

劉遠
貴族

蚤薄軒裳貴高尋綺皓蹤一囊間里藥六尺水雲
筇午枕眠芳景晴簷望遠峰柴門常不掩應得野
夫從

函關

雙峯高聳大河旁自古函關一戰場紫氣久無傳
道叟黃塵那有棄孺郎煙迷短草秋還綠露浥寒
花晚更香共說河山雄百二不堪屈指算興亡

贈趙宜之二首

夫子今詞伯胡爲遠帝京青雲無轍迹白髮有柴
荆鬼戲多年病人高四海名麟經方有缺無惜繼
丘明

轉徙家無地逢迎客有樽
光陰連病枕天地一愚
軒霜雪青松古風塵白
壁溫從渠投隙者袞袞向
金門

送裕之往許州酒閒有請予歌渭城烟雨者
因及之

白酒留分袂青燈約對牀
言詩真漫許知已重難
忘爽氣虛韓嶽文星照許昌
休歌渭城柳衰老易
悲傷

寄裕之

青雲一別阮家郎甚欲題詩遠寄將
好句眼前常
蹉過佳人心上不曾忘
誰家秋月茅亭底何處春
風錦瑟旁
昌谷煙霞久寂寞歡遊還肯到三鄉

山園

歲莫山園懶再行
蘭衰菊悴頗關情
青青多少無
名草爭向殘陽暖處生

御訂全金詩增補中州集卷四十三

金元好問原本

李講議汾

二十五首

補一首

汾字長源平晉人系出鴈門曠達不羈好
以奇節自許避亂入關京兆尹子容愛其
才招致門下留二年去之涇州謁張公信

甫一見卽以上客禮之自是游道日廣然
關中無一人敢與相軒輊者元光末用薦
書得從事史館舊例史院有監修宰相爲
之同修翰長至直學士兼之編修官專纂
述之事若從事則職名謂之書寫特鈔書
小史耳凡編修官得目錄分受之纂述旣
定以藁授從事從事錄潔本呈翰長平居
無事則翰長及從事或列坐飲酒賦詩一

預史事則有官長掾屬之別長源素高亢
不肯一世乃今以斗食故人以府史蓄之
殊不自聊高張諸人率以新進入館史家
凡例或未能盡知就其所長且不滿長源
一笑故刊修之際長源在傍則蓄縮慘沮
握筆不能下長源正襟危坐讀太史公左
丘明一篇或數百言音吐洪暢傍若無人
旣畢顧四坐漫爲一語云看秉筆諸人積

不平而雷李尤所切齒乃以嫚罵官長訟
於有司然時論亦有不直雷李者故證左
相半踰年不能決右丞師公以傷風化爲
嫌遣東曹掾置酒和解之不得已乃罷尋
入關明年驅數馬來京師日以馬價佐歡
道逢怨家則畫地大數而去又明年恒山
公仙在鄧之西山長源往說之署行尚書
省講議官旣而恒山與參知政事思烈相

異同頗謀自安懼長源言論欲除之遁之
泌陽竟爲所害長源孝友廉介過人者甚
多寧寒餓而死終不作寒乞聲向人人亦
以此愛之平生以詩爲專門之學其所得
爲尤多如洛陽才子懷三策長樂鐘聲又
一年清鏡功名兩行淚浮雲親舊一囊錢
煙波蒼蒼孟津渡旌旗歷歷河陽城長河
不洗中原恨趙括元非上將才三輔樓臺

全金詩卷四十三
三
失歸燕上林花木怨啼鵑空餘一掬傷時
淚暗墮昭陵石馬前同輩作七言詩者皆
不及也辛卯秋遇子襄城盃酒閒誦關中
往來詩十數首道其流離世故妻子凋喪
道塗萬里奔走狼狽之意雖辭旨危苦而
耿耿自信者故在鬱鬱不平者不能掩清
壯磊落有幽并豪俠歌謠慷慨之氣此詩
兵火中散亡今就其少作予所能記憶者

錄之

補歸潛志李汾長源先名讓字敬之太原
人少游秦中喜讀史書覽古今成敗治亂
慨然有功名心工於詩專學唐人其妙處
不減太白崔顥爲人尚氣跌宕不羈頗褊
躁觸之輒怒以是多爲人所惡嘗以書謁
行臺胥相國鼎胥未之禮也長源後投以
書盡發胥過惡胥大怒然以其士人容之

元光閒游梁舉進士不中能詩聲一日動
京師諸公辟爲史院書寫時趙閒閒爲翰
林雷希顏李欽叔皆在院長源少不下之
諸公怒將逐去亦不屑尋以病目免歸後
入南京上書言時事不報出客唐鄧會北
兵入境恒山公武仙署爲掌書記在軍中
金國亡長源勸仙歸宋未幾爲仙麾下所
殺年未四十哀哉平生詩甚多不自收集

故往往散落其再過長安有云三輔樓臺
失歸燕上林花木怨啼鵲空餘一掬傷時
淚暗墮昭陵石馬前望少室云圭影靜涵
秋氣老劍鋒橫倚斗杓寒夏夜云鴉銜暝
色投林急螢曳餘光入草深鸛雀樓云白
鳥去邊紅樹小斷雲橫處碧山多樂府歌
行尤雄峭可喜

補歸潛志南渡後士風甚薄一登仕籍視

金言卷四十三
五
布衣諸生遽爲兩途至於徵逐游從輒相
分別故布衣有事或數謁見在位者在位
者相報復甚希甚者高居臺閣舊交不得
見故李長源憤其如此嘗曰以區區一第
傲天下士耶已第者聞之多怒至逐長源
出史院又交訟於官士風如此可歎

陝州

黃河城下水澄澄送別秋風似洞庭李白形骸雖

放浪并州豪傑未凋零十年道路雙蓬鬢萬里乾
坤一草亭八月崤陵霜樹老傷心休折柳條青

州北

州北光風艷綺羅南來扈從北人多梨園法曲懷
奴舞月窟新聲倩女歌紫禁衣冠出金馬青樓阡
陌瞰銅駝薄游却憶開元日常逐春風醉兩坡

再過長安

細柳斜連長樂坡故宮今日重經過一時人物存

公論萬里雲山入浩歌白髮歸來幾人在青門依
舊少年多自憐季子貂裘敝辛苦燈前讀揣摩

汴梁雜詩四首

天津橋上晚涼天鬱鬱皇州動紫烟長樂觚稜青
似染建章馳道直於絃犬牙磐石三千國聖子神
孫億萬年一策治安經濟了漢庭誰識賈生賢
琪樹明霞五鳳樓夷門自古帝王州衣冠繁會文
昌府旌戟森羅部曲侯美酒名謳陳廣座凝笳咽

鼓送華輶秦川王粲何爲者憔悴囂塵坐白頭
樓外風煙隔紫垣樓頭客子動歸魂飄蕭蓬鬢驚
秋色狼籍麻衣漉酒痕天塹波光搖落日太行山
色照中原誰知滄海橫流意獨倚牛車哭孝孫
寥落關山對月明客窓遙夜夢魂驚二年岐下音
書絕八月河南風露清冉冉莫愁生草色迢迢秋
思入蟲聲誰知廣武英雄歎老却窮途阮步兵

上清宮三首

金詩卷四十三
憶昔秋風從茂陵詞臣忝預漢公卿瑤池宴罷西
王母翠輦歸來北斗城石馬嘶殘人事改劫灰飛
盡海山平唯餘太一池邊月伴我驂鸞上玉京
蒼梧雲氣赤城霞綿絡鈞天帝子家仙掌高承九
霄露霓旌遙駐五雲車昆明火劫驚人世瀛海風
濤撼客槎醉裏忽逢王子晉玉笙吹上碧桃花
千劫塵緣謝吏曹道山仙闕事遊遨樓臺縹渺滄
溟潤宮殿森羅紫極高幾代雲孫接仙李千年王

母醉蟠桃詩成便欲還山去猶待君王賜錦袍

避亂陳倉南山回望三秦追懷淮陰侯信漫

賦長句

憑高四顧戰塵昏鶉野山川自吐吞渭水波濤喧
隴阪散關形勢輒興元旌旗日落黃雲戍弓劍霜
寒白草原一飯悠悠從漂母誰憐國士未酬恩

雪中過虎牢

蕭蕭行李戛弓刀踏雪行人過虎牢廣武山川哀

阮籍黃河襟帶控成臯身經戎馬心逾壯天入風
霜氣更豪橫槩賦詩男子事征西誰爲謝諸曹

清明

鳴珂振轂滿重城春日綿綿老燕鶯人在碧雞坊
外住澹隨流水過清明

下第

學劍攻書謾自奇回頭三十六年非春風萬里衡
門下依舊并州一布衣

磻溪

封侯輸與曲如鉤冷坐磻溪到白頭老婦厨中莫
彈鋏白魚留待躍王舟

感寓述史雜詩五首

并引

正大庚寅予行年三十有九獻賦明庭爲有
司所病遂有不遇時之歎皂衣斗食從事史
館以素非所好愈鬱鬱不得志臥病中僻居
蕭條盡日無來人緬惟先哲凡所以進退出

全金詩卷四十三
九
處之際窮達榮辱之分立身行道建功立事
關諸人事者竊有所感焉於是始自騷人屈
平以來下逮漢晉隋唐諸公終之以遠祖鴈
門武皇作爲述史詩五十首以自慰其羈旅
流落之懷述近代則恐涉時事故斷自唐以
下不論嗚呼三百篇大抵皆聖賢感憤之所
爲作也余以愚忠謬信獲譏於斯世久矣非
敢示諸作者庶幾後世有揚子雲者出或能

亮子之宿心是歲秋七月旣望并州人李汾
引

蘇客卿秦

游說諸侯獲上卿賈人脣舌事縱橫可憐一世癡
兒女爭美腰閒六印榮

韓淮陰信

仗劍淮陰去復還舉頭西望識龍顏堂堂竟握真
王印未害男兒辱胯閒

叔孫奉常通

秦時博士魯諸生漏網驪山百丈阮邂逅劉郎習
綿絕便能彈壓漢公卿

馬中令周

脚踏長安陌上塵布衣西上欲誰親君王不省常
何策憔悴新豐一旅人

遠祖鴈門武皇

死心唐室正諸侯鐵馬南來隘九州當日三垂岡

上意諸孫空抱腐儒羞

擬張水部行路難

洛陽行人心欲折半年西州信音絕彈箏峽口兵
塵高半夜心懸隴山月君不見嗷嗷失羣鳥淚盡
眼流血潼關晝閉漢使稀安得慰我生離別

雲溪曉汎圖

曉景澹明月落影潭西丘晴川挂煙樹光拂雲河
流楓林入行色關山生白頭美美畫中人憶我秦

全金詩卷四十三
川游君帆渺何許儻下滄浪洲滄浪吾有約寄謝
同盟鷗

古月一篇爲裕之賦

古月天不收敵君三萬秋天孫弄明鏡光湧雲閒
流憶昔放逐江南州金陵女兒歌權謳草裹烏紗
巾散著紫綺裘酒酣把玉笛直欲捫參歷井騎斗
牛醉中呼兒搖雙舟吾欲乘流下石頭起來茫茫
視八極萬里只有元丹丘丹丘子游人閒風塵何

爲復往還玉華山人近招我九日朝帝蒼梧山

西歸

擾擾王城足是非不堪多病決然歸只因有口談
時事幾被無心觸禍機日莫豺狼當路立天寒鷓
鷯傍人飛終南山色明如畫何限春風筍蕨肥

避亂西山作

三月都門晝不開兵塵一夕捲風回也知周室三
川在誰復秦庭七日哀鴉啄新豐下陽翟草銜冤

血上琴臺夷門一把平安火定逐恒山候騎來

柳塘

長安西望少城隈楊柳陂塘手自栽渭水波光搖
草樹終南山色入樓臺平生事業書千卷浮世功
名酒一杯我亦陸渾山下去擬尋佳處斲莓苔

附鄠縣志柳塘在鄠縣終南山下紫陽楊
先生負隱居講學於此門人百人植柳千
株號曰柳塘中有清風閣紫陽泉李汾嘗

賦詩於此

附咸寧志臙脂坡卽翡翠坡或云與翡翠
相接李長源詩所謂薄遊却憶開元日常
逐春風醉兩坡也

李戶部獻甫

一十三首

獻甫字欽用欽叔從弟也兄欽止欽若皆
中朝名勝家故將種而同時四進士人門
之秀照映一時欽用博通書傳於左氏及
地理之學爲精爲人有幹局心所到則絕
人遠甚故時人有精神滿腹之目歷咸陽
簿辟行臺掾屬正大初夏人請和朝廷以
馮子駿往議欽用預行夏使有口辯馮善

人無以折之往復之際至以歲幣爲言欽
用不能平從旁進曰夏國與敝邑和好百
年今雖易君臣之名而爲兄弟之國使兄
而輸幣寧有據耶曰兄弟且不論宋日曾
與吾家二十五萬匹典故具在君獨不知
耶金朝必欲修舊好非此例不可欽用作
色曰使者尚忍言耶宋以歲幣餌君家而
賜之姓岸然以君父自居夏國君臣無一

悟者誠謂使者當以爲諱乃今公言之使
者果能主此議以從賜姓之例敝邑雖歲
捐五十萬某請以身任之夏使語塞和議
乃定使還朝廷錄其功授慶陽總帥府經
歷官尋辟長安令京兆行臺所在供須之
繁急於星火欽用所以處之者常若有餘
縣民賴之以安入爲尚書省掾壬辰之兵
奏充行六部員外郎守備之策時相倚任

全金詩卷四十三
之以功遷鎮南軍節度副使兼右警巡使
車駕東巡死於蔡州之難時年四十所著
詩書文號天倪集者留京師欽用死其家
亦破非同年華陰王元禮購得之幾有人
琴俱亡之恨然則文字言語之傳與否亦
有數存於其間耶

夏夜

銀潢淡淡沒疎星一陣涼從雨後生仰看浮雲成

獨臥數圍蛛網絡中庭

九龍池春望

五年外地看清明袖手低回過客亭謝絮楚萍無
定著春光如我更飄零

興慶池書所見

短短菰蒲刺水青翠萍開處鑑波明畫船轉過垂
楊外水面風來聞樂聲

題黃華幽居圖

層層佛屋貼山腰山下幽居勝午橋物外人家無
稅役閒中生理足漁樵鴈踰遠障凌空迴人與高
秋共寂寥何處人間景如此便應歸隱不須招

長安行

長安道無人行黃塵不起生榛荆高山有峰不復
險大河有浪亦已平向來百二秦之形祇今百二
秦之名我聞人固物乃固人不爲力物乃傾將軍
誓守不誓戰戰士避死不避生殺人飽厭敵自去

長安有道誰當行黃塵漫漫愁殺人但見蔽野雞
羣鳴河東游子淚如雨眼花落日迷秦城長安道
無人行長安城中若爲情

別春辭

東皇按轡來何遲人間二月才芳菲六十日春能
幾時不如意事常相隨一聲啼鳩花片飛把酒却
與春別離春緩歸聽我歌滔滔歲月如流波貴憂
孰與賤樂多吾寧不欲列華鼎馳鳴珂香屏倚妓

金言卷四十三
薦綺羅人生賦分有定在誰能買愁費天和長安
市上酒如海跨驢徑上胭脂坡酒酣酣舞雙婆娑
春自來去如予何

秋風怨

疎星耿耿明天河夜涼翠幕生微波碧梧委葉傳
金井一夕秋風將奈何春風令人和秋風感人悲
妾愁自與秋風期秋風爭管人別離燈炮垂紅粉
泥暗龜甲屏風雲影亂絡緯弔月啼不斷蓮漏壓

荷夜未半涼颼蕭蕭入疎竹枕底寒聲碎瓊玉敲
愁撼睡睡不明花露盈盈泣魚目秋風且莫吹念
妾守空閨嫁狗隨走雞隨飛九死莫作蕩子妻郎
薄倖妾薄命花自無言絮無定碧雲莫合郎未歸
幾度粧成掩明鏡

河上之役三首

河堤一決豈天窮失在當年固白公誰與麻岡開
故道暫教版籍見山東

新築河堤要策勳萬人採淨北塢薪青青好藉曹
州柳舊是中原一段春曹陷沒已久
萬夫卷土障橫流負土成山水未收明日落成真
盛事誰能作賦擬黃樓

圍城

碧樹蒼烟起莫雲長安陌上斷行人百年王氣餘
飛觀萬里神州隔戰塵身與孤雲向雙闕愁隨落
日到咸秦山河大地分明在莫爲時危苦愴神

驟雨

龍戰雲塵擁日囚鞭驅雷電走蛟虬望中雨脚橫
天落觸處湍聲卷地流梁苑樓臺失炎暑漢家城
闕動高秋若爲藉得天瓢去倒瀉明河淨九州

資聖閣登眺同麻杜諸人賦

高閣凌雲眼界寬野烟碧樹有無閒天邊孤鳥飛
不盡陌上行人殊未還魏國幾回時事改汴堤千
古夕陽閒愁來重倚闌干望崧少西頭是故山

蘧然子趙滋 一首

滋字濟甫本出馮翊其祖貞元閒來爲南
京漕司戶籍判官卒官下妻子不能歸遂
爲汴人濟甫少日出閭里閒其曉音律善
談笑得之宣政故家遺俗者爲多及長厭
於游蕩乃更折節取古人書讀之學書學
畫學詩學論文立志旣堅力到便有所得
爲人強記默識不遺微隱唐以來名人詩

文往往成誦如目前考論文義解析脈絡
殆若夙昔在文字間者畫入能品詩學亦
有功如黃石廟等作今代秉筆者或亦未
可輕議閒閒趙公書法爲今代第一手學
者多倣之但得其形似而已濟甫筆勢飛
動頗得公不傳之妙宗室胙公文采風流
照映一時而濟甫以布衣從之游商畧法
書名畫胙公亦以真賞稱焉隆德太一故

宮樓觀臺沼門戶道路花木水石悉能歷
數之聽者曉然如親到其處至宋名賢所
居第宅坊曲與其家行輩羣從孫息姻婭
排比前後雖生長鄰里不加詳也嘗往長
清一禪寺與僧談僧言五派傳授圖大不
易作濟甫笑曰易與耳因索筆作圖坐中
他日以舊本證之不毫末差也丁酉歲歿
於東州時年五十九

附元好問蘧然子墓碣銘泰和以來天下以能書稱者禮部閒閒趙公學者多倣之但得其形似而已南渡後始有蘧然子以蘧然子筆勢飛動得公不傳之妙故一時學公者皆不及而公亦有咄咄逼人之歎宗室胙國公文彩風流照映一時而蘧然子乃得以布衣從之遊與之商畧法書名畫筆虛筆實之論獨得於任南麓王黃華

之後君若真贗則望而知之胙公亦以真賞稱焉予官京師始用二公意交之而未歛也亂後予客冠氏蘧然子亦來東州每見之必連日竟夕而不忍去予居東州久將還太原行有日蘧然子聞之誦予詩文恨相見之晚而相從之不得久也爲之泣數行下丁酉冬復來東州而蘧然子已北世數月矣其壻商挺孟卿爲予言予已北

歸蘧然子爲之飲食不美者數日家人輩
問言元子得歸在渠爲可喜事而公爲之
損眠食何也蘧然子曰是豈兒輩所能知
也哉他日孟卿示予蘧然子故書凡予所
談往往記之紙墨閒予詩文則閒亦記之
也因竊爲慨歎蘧然子平生交不苟合人
與之言一不相入挾杖逕去不返顧其所
以愛我者乃如此予愚謬不足比數何以

得蘧然子如此哉天下愛予者三人李汾
長源辛愿敬之李獻甫欽用是三人者皆
有天下重名然長源獲死西山獄中敬之
則被掠而北爲非類所困折死於山陽欽
用從死淮西時年未四十也予常以三人
者之後當無有收衆人之所棄曲相獎藉
如渠輩者晚節末路乃復有一蘧然子思
欲與之隣屋相往來杯酒相樂就渠所談

如東京故事悉記錄之曾不五六年而又
若有物奪之而去者豈予賦分單薄善於
招殃致凶所與遊者皆爲所延及邪不然
何奪吾蘧然子之遽也蘧然子諱滋字濟
甫姓趙氏本出馮翊其大父天會貞元間
來爲汴梁戶籍判官卒官下妻子不能歸
遂爲汴人父諱青字漢卿蘧然子三男長
某次某兵亂中所失小子尚幼二女次卽

孟卿所娶者蘧然子春秋五十有九以病
終權葬於東平沂州門之外若干步庚子
歲除日子實銘之其銘曰積之之深守之
之堅傳人之所不傳兼人之所獨專自拔
泥塗如蛻而仙文以表之慰彼下泉顧雖
愛我豈以一言而敢私焉

黃石廟

狂豪擊車代無人神石一砭志乃信吹噓風雲遮

楚秦炎精熾然四百春一編尚悒續後塵江山有
待終此身望望久愁橫日民朝陽淒淒霜未休江
燕竟來江北游山回鼎移海橫流天風何時清九
州草泥自古踰王侯神棄不卹誰當羞割牲釀酒
空千秋

元格

遺山父中州集作先
大夫詩四十三首

鄉先生權叅知政事代郡楊公叔玉謨先
人墓銘今畧載於此先生姓元氏字德明
秀容人唐禮部侍郎次山之後自幼讀書
世俗鄙事終其身不挂口爲人誠實樂易
洞見肺腑雖童子以言欺之亦以爲誠然
也先大夫歿遺產無幾先生布衣蔬食處
之自若家人不敢以生理累之僮奴有竊

拾東家之棗者立命還之貧人負債則往
往令折券以貸之也累舉不第放浪山水
閒未嘗一日不飲酒賦詩春秋四十有八
終於家先生作詩不事彫飾清美圓熟無
山林枯槁之氣居東山福田精舍首尾十
五年東巖其自號也有集三卷藏於家銘
曰貪夫徇財智士死名宇宙古今萬轍混
并我機弗張我戶弗扃天宇泰然物莫敢

櫻飲芳食菲巖岫杳冥玉佩瓊琚御風泠
泠魯山之醇次山之清閱世幾傳猶有典
刑邈哉先生明昌承安閒科舉之學盛大
夫士非賦不談人知先生有聲場屋閒其
以詩文爲業則不知也先人捐館後十年
好問避兵南渡游道日廣世始知有元東
巖之詩楊尚書之美云彼美元夫子學道
知觀瀾孔孟澤有餘曾顏膏未殘林觀察

顯卿云文章變古名新體孝弟傳家守舊
規雷內翰希顏云詩句妙九州孝友化一
川王右司仲澤云讀書楓樹林曳杖白石
灣至今文彩餘虎子仍斑斑李長源云衣
冠巢許自高雅巖壑夔龍非棄捐餘人不
能悉記家集亂離已來凡三失之今所存
者特吾益之兄及門生輩所記憶者耳小
子不肖暗於事機不能高蹈遠引戀嫪升

斗微倖萬一以取繫維之禍殘息奄奄朝
夕待盡誠懼微言將絕謹以古律詩四十
首附之中州集之癸冊庶幾來者知百餘
年間作詩如先人而人或未之見其餘抱
一槩之操泯泯默默終老而無聞者豈勝
計哉是又可爲歎也

德明名格本元
郝經遺山墓誌

桃源行

山中三月山桃開紅霞爛熳無邊涯

音崖

山家藏春

金言卷四十三
藏不得落花流水人間來憶昔攜家竄巖谷秦人
半向長城哭回頭塵土失咸陽繪弋徒勞羨鴻鵠
冬裘夏葛存大朴小國寡民皆樂俗晝永垣籬雞
犬閒春晴門巷桑榆綠漁郎偶到本無心仙境何
緣得重尋今日武陵圖上看唯見雲林深復深

送德温同舍赴簾試

太常侍祠水蒼珮內相夜下金蓮燭皇家結網未
曾疎亦有佳人在空谷一從唐賦變遼律仰視折

楊猶雅曲雲臺勲業一青衫被髮操戈踵相屬筋
疲力涸僅乃得墨水一升凡幾辱英雄俛首入殼
中舉世悉然非子獨子家口衆親又老歲月旨甘
須寸祿薦書聞說過南宮冷暖人情到僮僕我初
與子偕計吏人後人前隨碌碌不慙齊客售鼓瑟
頗爲荆人悲獻玉一詩今日送君行萬里秋風看
鴻鵠功名前路知不免雞黍後期良未卜錦標無
用唵龍頭帛書且當傳鴈足

雨後

十日山中雨今朝見夕陽乾坤覺清曠草棘有輝
光竹影搖殘滴松聲送晚涼南窓聊自適無用說
羲皇

覽鏡

四十宜未老年年添鬢絲直教隨牒去也是挂冠
時臺閣多新賦山林有逸詩悠然一罇酒滿酌不
須辭

室人生朝

新酒清渾共糟牀洗盞嘗平時唯欲醉此日重難
忘容服慙王霸山林得孟光白頭翁與媪萬事聽
諸郎

太原古城惠明寺塔秋望

西山萬古壯陪京一日汾流入廢城浩浩市聲爭
曉集昫昫原隰但秋耕晉公老去詩仍在

晉公晉陽官舍

春日詩云白頭官舍裏今日又春風越石亡來恨未平千尺浮圖莫

烟底瓦盆濁酒爲誰傾

薄遊同郝漕子玉賦

全晉山河百戰場登臨歷歷見興亡夷居厖雜尤
堪歎霸氣沈雄亦未量石瓮烟霞詩秀潤駘祠風
月酒淋浪書生不是功名具慙媿山翁問葛強

山中秋夕

黃卷存餘習青燈共晚涼只知書味永不覺鬢絲
長老檜千年物幽蘭一國香平生陶靖節此夕邈

相望

寄宗人彥達

交城人

杯酒無緣接舊歡空將書尺問平安要君知我詩
成處落日西風正倚闌

榴華

山茶赤黃桃絳白戎葵米囊不入格庭中忽見安
石榴歎息花中有真色生紅一撮掌中看模寫雖
工更覺難詩到黃州隔千里畫家辛苦費鉛舟

過鳳皇山

在鳳門

鳳皇聞說似天壇北去南來馬上看想得松聲滿
巖谷秋風無際海波寒

瓶形嶺早發

在繁時界

海雲蕭瑟雪花乾人在羊腸百八盤閒客不知名
利苦見時應作畫中看

寒食再遊福田寺

春山寂寂掩禪扉複嶺盤盤入翠微布鞵青鞵供

勝踐粥魚齋鼓薦立機日烘幽徑綠煙煖風定曉
枝紅雨稀曾是西堂讀書客不應啼鳥也催歸

家園假山

八尺飛來峰蒼然立於獨細看甲乙字疑是平泉
族山非一草石見石山亦足便恐東岫雲來我簷
下宿今朝鑿盆池明朝種松菊自笑住山人何時
返巖谷

同侯子晉賦鴈

沈沈江浦雲浩浩朔漠雪微生幾寒暑翅老飛欲
折樓中見新過夕照送明滅欹枕數聲來疎窓耿
殘月悲鳴或天性南北隨所愜誰念孤旅人年年
爲愁絕

寒林圖爲侯子晉賦

川光茫茫風景莫一雪無情天地素長安閉門千
萬家亦有行人踏長路新豐煙火灞橋水畫史工
作荒寒趣雪中故事知幾何偏識詩翁忍寒處君

不見淮西城下鶯鸛鳴官軍夜斫吳家營只如党
家麤俗亦不惡銀燭金荷天未明拈出新詩三十

韻蹇驢席帽可憐生

雪詩三十
韻見坡集

贈答彥文相過之什

程太
原人

剝啄誰叩門開門得吾友握手一大笑慰我離羣
久之子富才具事業可力取瞻望青松姿衰遲愧
蒲柳金閨滿鴛鴦什伯自爲偶寂寞林野人過從
但鄰叟盤飧無兼味筍蕨才適口窮達俱偶然相

逢且杯酒

枕上

往時見白髮談笑輕歲月誰謂明鏡裏蕭蕭不勝
鑷山林蹉跎久世慮初未絕觸物重興懷忽忽不
自愜遭逢有奇耦才用隨巧拙如何杜陵叟自比
稷與契茫茫撫塵編何時卒吾業

秋莫王氏園亭

細徑雲林底危亭澗水滑秋先殞黃葉寒未老紅
葵嚼句幽禽答尋花晚蝶隨無人共幽興思與野
僧期

六言

北闕三臺五省東山萬壑千巖棊書中有真味風
月外無多談

山園梨葉有青紅相半者戲作一詩

霜輕霜重偶然中一葉雖殊萬葉同不信世間閒
草木解隨兒女作青紅

詩

少有吟詩癖吟來欲白頭科名不肯換家事幾曾
憂含咀將誰語研摩若自讐百年閒伎倆直到死
時休

樽酒

土灰論遠計木石笑浮生但有一樽酒何須千載
名

憶山中二絕句

東寺留連飲張園爛熳遊兒童望歸路一日幾登
樓

秋色山中好山翁醉不迴不知籬下菊霜後幾叢
開

山中雨後

遶屋湍聲轉臨崖老樹摧雷轟一雨去雲擘兩山
開

遣興

張翰一杯酒林逋千首詩性惟便自適材敢論時
施狡兔從三窟鷓鴣分一枝青山有佳色只似往
年時

發冀州留別恩禪師

詩拙非同社情親本故鄉共知成遠別且復暫相
將池古蓮花淨窓深檜葉香何時重攜酒來宿贊
公房

貴公子詠

高堂紅燭鼓聲齊舞遍纖腰月未西一曲纏頭一
雙錦驪騮空自惜障泥

蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹
青變畫史區區可得工

謝張使君夢粥餽春肉

牙豬肋厚一尺玉鹽花入深蒸脫骨韭芽蓼甲春
滿盤走送茅齋慰幽獨山人食貧才一粥幾被艾

生嘲首藉食前方丈非素懷頗憶懸貍繞高屋呼
來鄰叟共一飽爲說使君方繼肉饑民待哺今幾
家無策贊君慙此腹區區一肉見歌詠說食書生
良未足却愁今夕夢寐閒有物踏破園蔬綠

仙雞詩

并序

繁峙義興鎮酒家韓氏子畜一雞以善鬪雄
其鄉一日敵家以藥飼雞使不知痛求與韓
雞對韓雞鬪久果被傷口下頷不收垂死矣

一賣藥道人過其門曰我能活此韓欣然使
療之里中諸兒隨看者一二十輩皆使向壁
立道人以雞置籠中探手良久若摩撫然者
已而取瓢水啜之置瓢籠上卽出門兒曹怪
其久不還竊視之雞喙已復生矣道人布袍
草冠腋下懸青囊落魄嗜酒夜宿寺閣上韓
氏子與里中人奔走求之并所臥草薦不在
矣是時明昌七年仲規弟爲此鎮酒官予亦

在焉作仙雞詩以記之

老雄健鬪夸壇場韓郎抱歸神色傷豈知黠兒出
微倖毒手一發不得妨毳衣散灑尚可養利嘴一
哆何由張青囊道人何許來自言救藥吾有方垂
髯喫水濯殘血半喙隨手生新黃筠籠半開聞膈
膊草冠已往徒驚忙神仙世有寧虛荒惜哉詭激
不可量世人鷲勇天且劓況於物也資強梁敷榮
枯枿變金石未若與世鍼膏肓何須變化示狡獪
知君辨作淮南王蓬萊東望雲茫茫愛而不見心
爲狂刀圭不願換凡骨且欲共醉無何鄉

燈下讀林和靖詩

落葉落復落清霜今幾番疎燈照茅屋山月入頽
垣老愛寒花淡幽嫌宿鳥喧卷中林處士相對兩
忘言

觀西巖張永淳畫鴈

慘淡經營下筆難畫成不似卷中看知君連夜江

湖夢折葦蕭蕭沙水寒

從趙敷道覓石榴

仙人囊中五色露得種昔與蒲桃俱猩猩染花開
五月已覺秋實懸庭除張園一酸齒欲裂君家兩
株蜜不如竹馬兒童厭梨栗綠囊聊爲剝紅珠

雪行

五更驢背滿靴霜殘雪離離草樹荒身在景中無
句寫錯教人比孟襄陽

龍眠畫馬

驪黃求馬世皆然滅沒存亡自一天當日鹽車人
不識只今空向畫中傳

歲莫

藪藪霜力勁沈沈山氣冥北風半夜起吹動一天
星

送張冀州致政還都

狀元行
簡之父

一札恩書下紫宸東門祖道畫圖新路人也解賢

疏傳河內猶思借寇恂父子文章千載事田園松

菊自由身玉京才過梨花節靈沼行春莫厭頻

宋用

退傅張公閒遊靈

沼探春回故事

春雪

幾日韶華雪更侵龍公試手本無心寒留整整斜
斜態暖入融融洩洩陰著柳直疑香絮重擁堦還
似落花深前頭桃李應無恙剩破相如買賦金

楸樹

道邊楸樹老龍形社酒澆來漸有靈只恐等閒風
雨夜怒隨雷電上青冥

七夕

天河唯有鵲橋通萬劫歡緣一瞬中惆悵五更仙
馭遠寂寥雲幄掩秋風

觀柘枝伎

腰鼓聲乾揭畫梁綵雲縈出柘枝娘簾閒飛燕時
窺影鑑裏驚鸞易斷腸輕細不妨重暈錦迴旋還

恐碎明璫杖頭白雨催花急拂散春風兩袖香

附續夷堅志先人宰陵川泰和甲子元夕
縣學燒燈有以杏棗棠枯枝爲翦綵花者
燈罷家僮乞之供於縣署佛屋中四月上
七夜先夫人焚誦次乃見杏棠皆作花真
贗相間先人會賓示之以爲文字之祥爲
賦瑞花詩予年始十五矣

附遺山集先東巖君生平愛鳳山

鳳凰山
在鴈門

然竟不一到故詩有鳳凰聞說似天壇北
去南來馬上看想得松聲滿巖谷秋風無
際海波寒之句予二十許時自燕都試乃
與客登南樓亡友蘇莘老閻德潤張九成
王仲容輩說山中道人所居有松風軒層
簷高棟半出空際長松滿澗谷如雲幢烟
蓋植立闌楯之下山空夜寂石上聞墜露
聲使人耿耿不寐

附明一統志繫舟山在太原府城東北九十里禹治水繫舟此山故名有石如環軸曰繫舟鬼元好問父德明讀書其下趙秉文改曰讀書山好問詩從此晉陽方志上繫舟山是讀書山又云繫舟南北暮雲平落日滹沱一線明

附金詩紀事案中州集載楊叔玉墓銘云先生姓元氏字德明好問不敢名父故云

爾金史傳中不爲詳著漫從中州集所載亦以字書失實甚矣山西舊志中每有金人元格詩始知德明名格也

元好古

中州集作敏之兄 五首

敏之諱好古性識穎悟讀書能強記務爲無所不窺年二十就科舉時先東巖君已捐館太夫人年在喜懼望其立門戶爲甚切及再上不中意殊不自聊又娶婦不諧日致惡語遂以狷介得疾嘗作望月詩有莫怪更深仍坐待密雲或有暫開時之句人或言詩境不開廣非佳語也歎曰吾得

年不永境趣能開廣否未幾沒於北兵之禍年三十一

中秋無月

佳辰無物慰相思先賞空吟昨夜詩莫怪更深仍坐待密雲或有暫開時

讀裕之弟詩藁有鶯聲柳巷深之句漫題三詩其後

阿翁醉語戲兒癡說著蟬詩也道奇吳下阿蒙非

向日新篇爭遣九泉知

鶯藏深樹只聞聲不著詩家畫不成慙愧阿兄無

好語五言城下把降旌

傳家詩學在諸郎剖腹留書死敢忘先人臨終有剖腹留詩之

語背上錦囊三箭在直須千古說穿楊

題江村風雨圖

渡口舟橫水拍空墨雲傾雨樹號風江山不到紅塵眼半幅煙綃想像中

御訂全金詩增補中州集卷四十四

金元好問原本

鶴鳴老人李俊民

共七百零九首以下已借刻顧嗣立所錄元百家詩初選

中

補俊民字用章別號鶴鳴老人唐韓王元

嘉之後家於澤州少通程氏之學金承安

中以經義舉進士第一應奉翰林文字未
幾棄官教授南遷後隱於嵩山元世祖在
藩邸劉秉忠盛稱之以安車召見延訪無
虛日遽乞還山卒賜諡莊靜先生

集作莊靖世

祖嘗曰朕求賢三十年惟得竇漢卿及李
俊民二人澤守段正卿刻其遺集十卷長
平李仲紳王特升序之謂自筮仕後冥搜
隱索四十餘年雖片言隻字亦必有據劉

瀛云先生詩格律清新似東坡句法奇傑
似山谷集句圓轉脈絡貫穿半山老人之
體也雄篇鉅章奔騰放逸昌黎公之亞也
蓋爲當時所推重如此先生嘗自書登科
記後曰余闋承安庚申登科記三十三人
革命後獨與高平趙楠庭幹二人在一日
邂逅於鄉邑哽咽道舊壬寅五月庭幹復
挈家之燕京感慨忍淚書五十六字寄之

全金言卷四十四
試將小錄問同年風采依稀墮目前三十
一人今鬼錄與君雖在各華顛君還攜幼
去燕然我向荒山學種田千里莫鴻行斷
處碧雲容易作愁天是時蔡州失守已十
年矣故云

毛晉卿肖山堂

悠然林下客世事頗能料閒中意自適身外名肖
釣卜居山之陽初爲識者笑勢將陵岱華氣欲吞

嵩少方尋愿谷歸稍近孫臺嘯微茫數烟岫巉絕
對雲嶠爲我增雙明未必在遠眺始雖如面友久
得乃心照恐隨有力去或被移文誚已見成膏肓
百計莫可療一時烟霞語慎勿駭廊廟咄哉肖山
堂所以警不肖

母應之餉黍

憶昔周室衰周人詠黍離君今餉我黍爲賦黍離
詩厥初藝黍時飯牛使牛肥八月黍未穫胡兒驅

牛歸胡兒不滿欲我民還買犢今秋犢未大又被
胡兒逐胡兒皆飽肉我民食不足食不足尚可鬻
子輸官粟

游碧落

并序

壬寅重午日陪郡侯段正卿暨王用亨劉漢
臣濟之君祥仲寬姚子昂張唐臣祿卿平陽
趙君玉王潤之同行

浮雲翳炎景長夏愜幽事相陪林下友共造金碧
地清流漱寒玉老樹聳蒼翠何人開山祖妙處發
天祕悠悠歲月深剝落磨崖字遨頭興不淺有酒
留客醉幽鳥背人飛不慣聞鼓吹抵莫出山門溪
風送歸騎

郭顯道美人圖

君不見昭陽殿裏蓬萊人終惹漁陽胡馬塵又不
見吳宮夜夜烏棲曲竟使姑蘇走麋鹿移人大抵
物之尤喪亂未免天公愁雖然丹青不解語冷眼

指作鄉溫柔試問人間何處有畫師恐是傾國手
却憐當日毛延壽故寫巫山女麤醜
杜詩誰道巫山女麤醜何
得此有
昭君邨

宣差射虎 十二月初九日

北原風勁霜草枯草間出沒藏於菟耿耿來此被
誰驅不妨邂逅馮婦車將軍膽氣勇有餘手中笑
然金僕姑等閒如射兔與狐兩眼錯莫精光無深
山大澤失所居或撩汝頭編汝鬚可憐肉食無遠

圖伎倆不及黔之驢

羣鼠爲耗而猫不捕

欺人鼠輩爭出頭夜行如市晝不休渴時欲竭滿
河飲饑後共覓太倉偷有時憑社竊所貴亦爲忌
器不忍投某氏終貽子神禍祐甫恨不猫職修受
畜於人要除害祭有八蜡禮頗優近憐銜蟬在我
側何故肉食無遠謀耿耿雄相猛於虎不肯捕捉
分人憂縱令同乳不同氣一旦反目恩爲讐君不

見唐家拔宅雞犬上昇去彼鼠獨墮天不收

唐公昉師

李八百得其神丹遂舉家昇天雞犬皆去唯鼠空中自墮腸出一月三易其腸今山下有拖腸鼠東

廣微所謂唐鼠

埽晴婦

并序

世俗爲埽晴婦者蓋假變理之手導陰陽之和使民間免乾溢之患也感其事而賦之

卷袖舉裳手持帚挂向陰空便搖手前推後卻不辭勞欲動不動誰掣肘偶人相對木與土神女但

誇朝復莫龍公不作本分事中間多少閒雲雨見說周人憂旱母寧知東海無冤婦慙慙更倩封家姨一時斷送龍回首

姚子昂畫馬

雄姿卓立開天骨騰踏萬里如神速可憐不遇九方臯空使時人指爲鹿自從大奴守天育無由更騁追風足中原一戰收乾坤白髮將軍髀生肉

苴履

待詔門前東郭趾藍關路上仙人迹雪花紛披蓋
地白東家不藉藉不得雖然近市屨亦無以故爲
新卽有餘同行留我木上座補過仰渠金十奴一
生能著屐幾兩用心猶在阮孚上不須更覓下邳
侯山林此計成長往

時守下邳

籌堂尋梅

蕭疎籬落誰家圃尋芳信逐游蜂去眼前荆棘少
人行馬蹏直到香來處怕愁貪睡獨開遲瘦損春

寒鶴膝枝可是東君苦留客斜風細雨不堪詩

綵樓

并序

高平縣綵樓聞之舊矣今始親見議者猶謂
高下侈麗不及向者三分之一因感而賦之
層層華構高且崇萬綵糾結填青紅何人下手奪
天巧都入意匠經營中書契以來未省見異事驚
倒百歲翁郢斤般斧莫敢近郤立屏息慚無功寒
窓憂憂鳴機婦積年杼柚一日空山川謂可錦繡

裏塵土盡皆羅綺封前者攀轅後者挽奔車徑欲
趨靈宮三年送迎禮雖舊人事不與天時同方當
炎屬行夏令權勢大抵歸祝融神之於人無厚薄
蓋以至誠能感通豚蹠豆酒道傍祝所獲神賜亦
已豐問閻疾苦還知否我爲大夫歌大東

享炎帝
閏年

上九里谷與濟之君祥仲寬李德方朱壽之

姚子昂

太行巍巍形勢尊造物設險雄中原巨靈一朝擘

石裂連峯忽斷開山門侵雲直上幾千尺挂壁一
徑愁攀援十步回頭五步坐慄慄汗出如漿翻清
風掖至最高頂下視寰海塵埃昏天壇咫尺若有
待顧我不往慚食言世間好處豈不愛脚力雖盡
心長存爲君試寫遠遊興夜半月出清吟魂

與祁
定之

約游天
壇不果

游濟源 并序

庚子春季與劉濟之君祥仲寬仲美姚子昂

秦懿夫馬子温李德方深之伯英朱壽之下
太行抵覃懷望方口臨沈水二十三日丁亥
郡侯段正卿因西山鎮邊回自析城來赴期
值雨留宿奉仙觀翌日己丑天霽具牲酒幣
帛謁清源王廟禮畢會友人郭伯玉李慶之
王天益史德秀王輔卿紇石裂仲傑完顏壽
之方外士祁定之郭道正元明道部將段玉
等大飲於裴公亭用麾下鼓吹以樂賓薄莫

極歡而罷故賦之紀一時之勝游也

元戎小隊閒登臨悠悠旌旆穿山林太行南下路
險澀不憚著脚窮幽尋清源祭秩世所重喬木掩
映靈宮深是時方口雨初過天風破曉開微陰入
門爲問廟見禮白髮黃冠通古今且言享誠非享
物那在與俗占浮沉鞠躬執簡默有禱脯酒縱薄
神所歆幾年願違莫能遂至此始得償初心點檢
圖經歎禹迹山青水綠無知音竹根醉倒客星散

夜聽波底蛟龍吟

河橋成 并序

橋成有日必有佳句寫河上逍遙之興贈子
榮及督役楊成之

預積他山本重新兩岸隄龍依天上臥虹傍水心
低不假鞭秦石何勞立蜀犀落成應有日誰向柱
先題

乙未冬至

已應黃宮律初生復卦陽道隨天在北愁與日俱
長節物驚時換年光有底忙浮雲多變態試與問
何祥

元夜有感

春城行欲遍百感到愁邊市冷猶燈火人稀尚管
絃梅從今夜落柑憶舊時傳歸去西窓月無情照
不眠

游青蓮

行處春風惡山中勝槩藏漸佳如蔗尾薄險似羊腸翠揖雙峯角清臨一水堂夜長僧睡少爲我話興亡

過雲中

把酒不成醉出門行路難客愁千里破歸夢五更殘三仕有何喜一生常鮮歡恨無南去鴈爲我報平安

宿海會寺二首

同孫講師明上人趙叔寶劉巨濟夜酌

佛堂光未放桑下喚難回是處皆堪歇何山不可開泉因龍吐出經自兔銜來徑向黃沙過尋僧問劫灰

青山雲水窟杖錫幾時來竹待香巖擊松經道者栽西江無水吸震旦忽花開三笑圖中友同傾破戒盃

九里谷

九曲羊腸路千層劍戟山行鈎藤蔓刺坐印石花

斑樹發三春莫雲歸萬壑閒相陪林下屐雖倦不
知還

獨坐

地偏無俗客日在掩柴扉暑退閒蒲扇涼生換葛
衣風高雲散影露下月揚輝獨據胡牀坐心清卽
道機

乙亥過河

一身長道路四海尚風塵昔作依劉客今爲去魯

人渡河年在亥乞酒歲非申別後山中友相逢話
又新

過星輅

古道開天險危峯拔地形連營南北戍過客短長
亭野燒驚山鬼胡雲掩將星何人弄羗管哀怨不
堪聽

用趙之美留別韻四首

把酒離筵且莫辭坐中瓜葛暫相依花從識後常

含笑鳥自還時想倦飛往事微茫春夢斷故人牢
落曉星稀天涯白髮禁愁得好在西山不早歸
長短亭中送別時問君東去復何依今宵明月三
人共來日紅塵一騎飛傾蓋莫嫌相見晚斷絃惟
恨賞音稀天涯盡道還家好笑我雖歸似不歸
爲君不惜送行詩但恨蒹葭失所依流水盡朝東
海去孤雲只向太行飛仕途冰炭收心早客路參
商見面稀一曲陽關歌未徹聲聲頭上聽催歸

遙指東山去恨遲爭如蓮幕早來依須知宋鷓猶
能退有底齊禽尚不飛洛下書生憐我少燕南壯
士似君稀主人好客厭厭醉正要髡留肯放歸

赴山陽

寄君祥濟之
仲寬子昂

立馬西風不忍行往回只是片時程一年又作半
年客百里有如千里情落日寒林山下路淡烟疎
竹水邊城願君把酒休惆悵四海由來皆弟兄

白文舉王百一索句送行

全金詩卷四十四
三
世事紛紛亂似麻不堪愁裏度年華傷心城郭來
家鶴過眼光陰赴壑蛇彈鋏歌中成老境班荆話
後各天涯何時造物歸真宰却覩人間第一花

承二公寵和復用元韻二首

脫却朝衫著紵麻殘年猶復夢京華世情共指鹿
爲馬天意反教龍作蛇白髮不公人易老青山有
素恨無涯那禁送別東郊外滿目離離濺淚花
有客衡從說藝麻要教身後見西華若爲養得能

言鴨未解除他引睡蛇歸去稍知閒氣味荒唐猶
種老生涯眼前浮世憑誰問獨倚東風看落花

和東庵孔安道韻

擬結閒中一草堂此心安處卽吾鄉須知見在身
爲患見說長生藥有方老去看書徒引睡愁來得
句不成章從前習氣都除盡待與高人論坐忘

和子榮

暫使彭宣到後堂安昌只以醉爲鄉浮雲世事日

千變流水生涯天一方老子興雖如庾亮故人恩
不減蘇章能消幾兩尋山屐回首狐丘本未忘

籌堂壽日二首

此生但覺醉鄉寬

王績

誰謂螭猶北海蟠

王猛處

處相迎皆倒屣

王粲

人人共喜欲彈冠

王陽

州應

向日懸刀夢

王濬

山試今朝拄笏看

王子猷

仙馭

未來緱氏鶴月明吹徹玉笙寒

王喬

烏衣歷歷是名家人物於今比晉多俗論不侵揮

塵話

王衍

壯懷多副缺壺歌

王大將軍

雖無金埒

堪調馬

王濟

賴有黃庭可換鵝

王羲之

見說長江

欲飛渡

王濬

那須水合望滹沱

王霸

用子榮河橋送別韻

河橋把酒不成歡正是離人去住閒公道幾時饒
白髮世情今日看青山娟娟明月無家對慘慘孤
雲待我還慚愧殷勤花裏鳥一聲聲送出陽關

承徐子賢賈仲常張伯英寵和復用韻

天涯盃酒強追歡白髮光陰轉首閒獨夜夢魂千里月莫年心事數重山回腸都爲愁將斷行脚猶疑債未還儻得一廛休老地柴門今後定牢關

宿邨舍四首

別後曾無一日歡風流都在落花間眼青羞對門前柳頭白相驚雪裏山華表鶴來猶是客烏衣燕去不知還森森庭院荒荆棘虎豹窺人夜撼關握手親情有底歡疎籬茅舍兩三間尚憐作者干

年調那肯分人一半山安得意如張翰適憑誰放

取浩然還得君斗酒須防客不怕重門更著關

坡云

重門著關不爲君政恐惡客來仇餉

懷抱何曾得少歡春愁飛上兩眉間一瓢謾酌獨

清水幾屐能窮無盡山見說酒兵長日備

江諮議酒猶兵

也可干日不用不可一日不備酒可干日不飲不可一飲不醉未知詩債幾時還

須防別後將軍槩不待尋盟輒斬關

三兩殘盃不盡歡強陪年少貴游間客中未必常

爲客山上那堪復有山鶴髮都從愁裏變貂裘直
待醉時還一朝却入龐公市驚倒城門老抱關
城門抱關卒
怪我此重游

憫董用之

怪底年來懶下帷似嫌榜尾姓名題一枝自謂烏
難借百里誰知鳳肯棲頗訝生前徒強項未應老
後不然臍試將點檢平時友大半佳城在馬蹏

悼籌堂

霞鞍金轡紫絲條玉帶紅靴織翠袍
趕趕少年眞手臂津津玉氣見眉毫不愁造化功難補可惜秋
山勢自高那免牛車身後患一場春夢亦徒勞

送趙慶之赴邠州

且莫怱怱數去程一壺別酒爲君傾
三年簿領妨行樂十里溪山管送迎
湓浦蘆花風裏恨渭城柳色雨中情
三峯無復同州看休著新詩笑不平

和子搢來韻

新年桃李似無情回首繁華一夢驚
點檢青瑣非故物等閒傾蓋昧平生
雨中燕子還留客風裏楊花欲送行
試聽東流橋下水向人時作斷腸聲

和河上修橋二首

日日相陪杖屨游往來林下亦風流
雲間隱隱堆螺髻雨後鱗鱗漲鴨頭
休恨臨津臨津河經始晚且

看利涉河橋名落成秋尋常公事閒
中了詩債如何

尚不酬

落魄天涯頗倦游片帆歸去得安流
幾年無事誇犀首一旦封侯看虎頭
飛將正當南渡日拾遺還是北征秋
龍鍾不稱凌烟像只有山林志可酬

壬寅九日同史正之劉濟之君祥仲寬姚子

昂東城小酌寄錦堂王君玉

興來落筆任橫斜坐上朋樽續續加
貌似葉紅皆被酒頭如雪白也簪花
金風漸急秋將暮玉樹相依客盡嘉
醕酌入城扶不去臨街下馬是誰家

和子榮悼恒山韻

功名人比漢淮陰猛虎俄因犬輩擒星落旄頭兵
似火雲屯細柳士如林豈期虞虢乖唇齒謾倚良
平作腹心灑盡英雄憂國淚變風那得不傷今

恒山

謂恒山公武仙其次首云唐家外望歸藩鎮漢室
中興仰羽林又剛忠公一首云斷頭那肯降朱泚
血指誰思滅賀蘭皆為汴京之亂言之也

送別曹漢卿

馬上功名奈老何出門無地不風波憑誰試著回

天力有容空揮却日戈青眼乍驚行處少赤心常
笑話中多愁人近亦無腸斷又聽離筵送別歌

莫春和端甫韻

并序

莫春索詩且以不能陪郊外之游為恨

雨夕風朝樂事妨老來猶自為花忙春光一歲只
三月樽酒百年能幾場辛苦衙蜂輸蜜課等閒巢
燕得泥香如何復共遨頭醉待把銀瓶指點嘗

調祁定之

風埃滿面髮蓬垂欲學喬松久遠期浮世幾場漂
杵血流年一局爛柯碁不須玉女引巢父那在神
官邀退之果待吹噓送天上人間事了未爲遲

和述懷二首

簪履三千氣壓齊寒林那羨一枝棲坐中有客鵬
將賦門外何人鳳欲題酤酒未嘗防惡犬著鞭寧
復待荒雞夕陽休凭欄干望今日長安不在西
擬將齊物物難齊惟有山林跡可棲身望鳳池慚

不到名登鴈塔愧先題未能忘舊歸家鶴長是思
鳴失旦雞天爲東周道垂喪肯生夫子在關西

答子榮

行藏事拙且乘流游徧人間老卽休多汗愈膚三
伏暑漸衰潘鬢一時秋風高勢欲欺茅屋雨急聲
疑在竹樓今世宦情何處好但憂無蟹有監州

卽事

鐵馬長驅汗血流眼前戈甲幾時休誰能宰似陳

平社那免悲如宋玉秋漠漠微涼風裏殿蕭蕭殘
夜水邊樓千邨萬落荒荆棘何止山東二百州

寬張文玘

怪來久不造龍門依舊相逢一笑溫任把錦囊嘲
李賀休將布鼓詫王尊事隨勢過心猶駭言與時
違舌可吞誰爲書生肯推轂綈袍且念故人恩

讀五代史

破却千金築一臺折衝閭外望人才中原山嶽河

分斷塞上牛羊草引來西海正驚天狗墮北人忽
擁帝羝回猶憐仙掌英靈在誰把潼關閉不開

索和長平諸詩友送行韻信筆奉呈君玉閨
之資客中一笑

漢厦非無論道瓊自慚老去鬢皤然閒愁似海藏
皮裏往事如風過耳邊幾度班荆誰與話一朝傾
蓋總相憐柴門近日多來客火速移牀待孝先

昨晚蒙降臨無以爲待早赴院謝聞已長往

何行之速也因去人寄達少慰客中未伸之
志耳

書生掉舌豈其時手底青編亦倦披鐵鎖尚沈江
漠漠銅駝又沒草離離陰山路上明妃曲天寶年
中杜甫詩古往今來幾興廢白頭恨見太平遲

送郡侯段正卿北行二首

征途萬里朔風寒過盡陰山復有山歲旣在於辰
已後星多客向斗牛閒漫漫積雪無冬夏劫劫飛

鴻自往還若到龍庭試回首太行一片白雲閒
獵獵霜風墮指寒一鞭行色抵天山馬嘶衰草孤
烟外鴈沒長空落照間入塞盡穿羶帳過去鄉須
待錦衣還功名大抵黃梁夢薄有田園便好閒

杜門

近來人事頗相乖獨坐何曾得好懷犬吠爲連酤
酒市雞鳴長傍讀書齋門終待學張家塞闥恐難
當噲等排惡客就中多氣岸時時下馬繫堂階

中秋

露下天街一氣涼月明不復被雲妨
正當金帝行秋令疑是銀河洗夜光
鮫室影寒珠有淚蟾宮風散桂飄香
席間醉客忙歸去獨共三人盡此觴

代樂仲和張溫甫處督米

未必書生氣盡寒食常不足爲居閒清於孺子滄浪水瘦似詩人飯顆山欲向田文彈鋏去恐因丘嫂頡羹還聞君自有江湖量肯爲枯魚少破慳

和王季文襄陽變後二首

逐鹿中原未識真指蹤元自有謀臣虞全不念唇亡國楚恐難當舌在人拔劍挽回牛斗氣舉鞭蹙起漢江塵相逢空灑英雄淚誰是荊州一角鱗天命須分僞與真衙蜂戰蟻盡君臣蛟龍不是池中物燕雀休嗤壘上人衣不能勝嵇紹血扇無可奈庾公塵自從絕筆春秋後誰復傷時爲泣麟

一字題示商君祥

并序

全金詩卷四十四
三
余年三十有九遭甲戌之變乙亥秋七月南
邁時姪謙甫主河南福昌簿迎至西山僑居
廳事之東齋小學師商君祥投詩索和頃刻
閒往回數十紙謙甫曰一鼓作氣未可敵姑
堅壘以待姪壻郭鴻漸曰可以單師挫其銳
乃出百字題請賦以酬之遂信筆而書殊無
意義副其徒孫男樂山示之三日不報謙甫
笑曰五言長城不復敢攻也君祥於是攜酒

來乞盟大會所友極歡而罷

雲

早魃將爲虐從龍便出山人閒三尺雨命駕早知
還

雨

晚有來蘇意憂深望歲人一犁雖美滿猶恨不當

春

塵

不憂懸榻室可奈汗人風踏破青鞵底猶疑是輓
紅

春

來莫愁春遲去莫怨春忙春不隨人老誰教汝斷

腸

梅

未報江南信先開雪裏邨要看花上月立馬待黃

昏

松

鬱鬱愁無地青青獨有心疑從大夫後傾蓋到如

今

竹

瀟灑能醫俗檀欒看上番我寧負此腹忍使籜龍

冤

蜂

弄晴沾落絮帶雨護園花有課常輸蜜無春不到

衙

僧

貌與松俱瘦心將絮共沾一庵空寂地香火讀楞

嚴

漁

一聲歌款乃萬頃國烟波鼇蟹中間醉蓑衣拜浪

婆

樵

雲外山將遍人間日易斜不知棊換世柯爛未還

家

硯

端溪溫潤石價重百車渠一滴玄潭水蠅頭萬卷

書

香

小炷博山鼎半殘心字灰游蜂何處客應為百花

來

隱

孔負二宜去嵇如七不堪青山休老地佳處是終

南

壽

灰如戀關心雪似窮經首問年今幾何看飲屠酥

酒

行

水笑盃猶渡山驚錫尚飛垂垂瓶鉢老何處未來

歸

住

俗尚家靈運誰堪社遠公空山雲不出愁殺渡溪

風

飲

竹葉盃中醪金釵坐上春淺斟低唱境猶道是麤

人

嘯

成晉風生坐孫登月滿臺東皋今寂寞
元亮早歸來

愁

解使回腸斷能催兩鬢秋
天涯未歸客容易上眉頭

十六日夜戲書

貪作

臧祚切

梅花夢都忘柳絮禪
可憐人與月不似

夜來圓

老杜醉歸圖二首

尋常行處酒債每日江頭醉歸薄
莫斜風細雨長安一片花飛

百錢街頭酒價蹇驢醉裏風光莫
傷鄭公門去恐猶恨在登牀

卜居

東鄰西舍兩三家
簌簌牆頭落棗花
慚愧畫梁雙燕子
笑人今日又天涯

和籌堂途中卽事

晚風吹雨過山堂燈火秋涼好對牀却被荒雞笑
人懶一聲催起著鞭忙

過雲臺

夜半風吹霽色開曉乘殘月過雲臺連山斷處瞰
平野一線黃流掌上來

濟源龍潭

塵世悠悠不識真一潭春碧養潛鱗可憐無故驚

雷起誤却山前失筇人

雨後

春空靄靄莫雲低飛過山前雨一犁明日却尋歸
去路馬蹏猶踏落花泥

阻風

東風作惡幾時休況值春光欲盡頭誰謂閒人無
箇事一年長是爲花愁

明皇擊梧圖

不使梨園弟子知
太平音在鳳凰枝
一朝野鹿銜
花去長恨秋風落葉時

陽關圖

一杯送別古陽關
關外千重萬疊山
試問青青渭
城柳不知眼見幾人還

千里江山圖

筆下江山取意成一峯
未盡一峯生憑誰試向行
人問水郭烟邨第幾程

雪後送寶泉之碧落

酒面輕風不作寒
天花散落滿人閒
殷勤行脚休
辭遠出得城門是雪山

和王成之梅韻

朝來一雪羃晴沙
行到前村始見花
驛使便將春色去
暗香今夜落誰家

下太行

山中日日伴雲閒
不見閒雲只見山
君去試從山

下望青山却在白雲閒

東山道中

採遍山城草木芽百年老樹盡枯查眼前多少閒
田地雨後春耕有幾家

太平泉

試從澗底覓根源剔蘚剝苔得舊泉人事盡隨流
水去幾時復見太平年

十七日送行

怱怱又別故園春花落猶隨馬後塵相對離筵莫
惆悵送行人是欲行人

寄別

馬蹏踏破亂山青送客風回酒半醒歸客莫將雲
外指大都一十五長亭

孟浩然圖

却因明主放還山破帽騎驢骨相寒詩句眼前吟
不盡北風吹雪滿長安

夜夢月下與數仙子酌酒仍各賦詩

天風一掃莫雲開收拾羣仙共酒杯但指今宵是
新月不知曾照古人來

和平太行路韻

鑿開險阻若天成暫使時閒眼界平却羨長安西
去路青山不管送人行

和君瑞月下聞砧

夜涼枕上夢頻驚有底秋天不肯明老眼近來閒

淚少那禁月下擣衣聲

香梅二首

鄧妓之小字匠手有詩
邊仲寧索和因用其韻

被誰說破夢中梅應有羅浮倒挂來祗爲怕愁貪
睡後返魂纔向北枝開

一枝瀟灑隴頭香分副新愁竹葉觴紙帳不須尋
短夢天涯倦客已無腸

魏徵

立朝謹議盡良規誰使君王死後疑一日鑿輿渡

遼水卽時扶起墓前碑

王庭秀悠然軒

小軒開後快雙明峭拔南山立翠屏好是晚來新
雨過白雲堆裏露尖青

留別

主人把酒再三留送客風高勢未休更聽愁眉歌
一曲樽前腸斷小溫柔

寒食戲書

驀見花間弄藥回同心髻綰綠雲堆多情更有牆
東月送得秋千影過來

周昉內人圖

倦繡

心情猶在未收時却顧花間影漸移不道春來添
幾線日長只與睡相宜

擣衣

一夕秋風鴈過聲鐵衣辛苦向邊城將軍不用和

戎計雙杵休辭月下鳴

按樂

倚風無力見溫柔初下喧天羯鼓樓猶向花陰理
新曲君王不惜錦纏頭

覽鏡

不教朱粉汙天真長對菱花顧影頻但把蛾眉掃
來淡尚嫌不似號夫人

襄陽咏史

漢高廟 在襄陽縣西南鍾山

垓下未聞歌散楚澤中已見哭亡秦乾坤到底歸
真主愁殺鴻門碎斗人

光武廟 在襄陽東四十五里光武南陽棗陽人今棗陽縣是也春陵在棗陽東望氣者蘇伯阿至南陽遙見春陵曰氣佳哉鬱鬱蔥蔥光武始起兵還春陵望舍南火光燭天今棗陽在襄陽東界六十里

海內英雄待一呼雲龍際會入東都羯奴不識真
人事微幸中原欲竝驅

宋玉宅

在宜城縣

離騷經裏見文章水綠山青是楚鄉往事一場巫

峽夢秋風搖落在東牆

關將軍廟

在襄陽南九里鳳林關

鼎足相吞勢未分誰能傾蓋得將軍曹吳不是中

原手天下英雄有使君

劉表祠

祠前有墓在府城東門內

天運端能臥可收江山形勢數荆州當時若聽韓

嵩策那得曹瞞享士牛

曹操與袁紹相持於官渡韓嵩說表起乘其弊表不

從操征表表之子琮竟以荆州降

鳳林

孟浩然故居在襄陽縣南十里

天寶詩人去却回果曾北關上書來若為耆舊無

新語明主何嘗棄不才

張參議有朝宗強欲相牽率豈識先生玩世心

杜甫故里

杜易簡預之遠裔有從弟曰審言生子閒閒生甫世居襄陽甫徙家

鞏縣

不知故隱幾時離天寶年間處處詩過客不須尋

世譜萬山山下看沈碑
杜詩吾家碑不昧王氏井依然注杜預沈碑峴山下

集古

寒食席次

鞦韆打困解羅裙把酒相看日又曛處士不知巫
峽夢春來猶見伴行雲
韓偓 韋莊 蓮花奴 韋氏子

惜花

繡輓香鞦夜不歸看花只怨看來遲今朝幾許風

吹落多在青苔少在枝

崔塗 韓偓 楊巨源 崔櫓

春怨

已恨東風不展眉落花惆悵滿塵衣與君試向江
邊覓贏得淒涼索漠歸
段成式 趙渭南 東坡 吳融

贈別二首

洞庭風軟荻花秋客散江亭雨未休南去北來人

自老此中離恨兩難收

鄭德璘 岑參 杜牧 魏野

誰家紅袖倚江樓白袷行人又遠游今夜不知何

處泊青山萬里一孤舟

杜牧 甫里 權德輿
劉長卿

送客之荆南

千山紅樹萬山雲 山鳥江楓得雨新 我自飄零是

羈旅不堪仍送故鄉人

韋莊 雍陶 東坡
顧非熊

聞角

鐵馬狐裘出漢營 瘴雲深處守孤城 無端遇著傷

心事鳴軋江樓角一聲

常建 劉禹錫 吳融
杜牧

春夜

春風二月落花時 憶得前年君寄詩 共道人家惆

悵事向燈彎盡一雙眉

武元衡 崔道 牛僧
孺 韓偓

送客之南宮

蕭蕭風竹夜窓寒 書劒催人 不暫閒 對酒已成千

里客 斷腸聲裏唱陽關

武元衡 杜巖 盧綸
李商隱

夜集

金鳳羅衣濕麝薰 裝成掩泣欲行雲 傍人未必知

心事一曲狂歌酒百分

韋莊 戎昱 劉阜
高駢

戲書

春風何處有佳期
花滿西園月滿池
料得也應憐
宋玉東鄰牆短不曾窺

武元衡 高駢 李商
隱 段成式

柳

還到春時別恨生
渭城朝雨裊輕塵
自家飛絮猶
無定不解迎人只送人

張泌 王維 羅隱
皇甫冉

醉眠

糝逕楊花鋪白氈
日西鋪在古苔邊
滿山明月東

風夜留與遊人一醉眠

杜子美 王建 韓偓
鄭谷

全金詩卷四十四

全金詩卷四十四

三

三

全金詩卷四十四

三六

全金詩卷四十四

三六

